

Te Hui Taumata mō te Reo Māori

I te 12 o Mahuru i tū Te Hui Taumata mō te Reo Māori i te Whanganui a Tara. Nā Te Taura Whiri i te Reo Māori i whakahaere te hui nei. Kikī ana te whare i ngā tāngata, kuia mā, kōroua mā, tāngata pāpāho, tāngata hanga rauemi, ngā kaiako hoki, i haramai ki te whakarongo, ki te kimi whakaaro, ki te kōrerorero i ngā take e pā ana ki te reo Māori.

E toru rā te hui nei. Nā tētahi o ngā kaiwhiri a Te Taura Whiri i te Reo Māori, nā Wayne Ngata, i powhiri te hunga manuhiri. Ko te rā tuatahi, he wā whakarongo ki ngā kaikōrero. Ko Te Heikōkō Kāterina Mataira, ko Chris Winitana, ko Cathy Dewes ngā kaikōrero, ko Huirangi Waikerepuru tētahi atu. Tae noa ki te ahiahi, he wā mō te katoa ki te kōrerorero, ki

te whai pātai, ki te tautohetohe, ki te taupatupatu rānei.

I te rā tuarua ka whakarōpūtia te katoa ki roto i ētahi awheawhe. Nā ngā kaiwhiri i whakahaere ngā rōpū, ā, nā Hana O'Regan i whakahaere te kaupapa Reo i te Kāinga. Nā Wayne Ngata i whakahaere te kaupapa Reo i ngā Kura. Ā, nā Ruakere Hond i whakahaere te kaupapa Reo i ngā Takiwā. I reira ka puta ngā whakaaro ā-hinengaro, ā-waha hoki. Ko te ngako o tēnei mahi, kia whai hua mai i ngā tāngata, hei aha, hei heri i te reo Māori ki te taumata, kia whainiho te reo mō tātou me ngā whakatipuranga reanga.

I te rā tuatoru ka whakakotahi anō te hunga, ka wānanga haere i ngā whakarāpopototanga i puta mai i ngā mahi o nanahi. Ka whakahōtia

anōtia ngā whakarāpopototanga, ā, ka puta mai ngā tūtohunga. Mēnā e hiahia ana koe ki te mātakitaki, me whai i te paetukutuku www.koreromaori.co.nz.

Ko te tino painga o tēnei Hui Taumata, kua puta mai ngā hiahia, ngā whakaaro a Māori mā, kia arahina tātou ki runga i ētahi huarahi whaioranga mō te reo. Kia whakatikaina ngā mahi a te Kāwanatanga kia tautokona te reo Māori, kia āwhinatia ngā whānau, ngā iwi i ā rātou ake mahi mō te reo.

Nā reira, e ngā poutokomanawa i te reo Māori i tae mai, ngā tāngata i haere tawhiti mai, i haere tata mai hoki, tēnā koutou. Me whakapūmau tonu ki te whakatinana mai i ngā moemoeā o ō tātou mātua tīpuna hoki - Kōrero Māori i ngā wā katoa.



Ko Te Heikōkō Kāterina Mataira, ko Liz Hunkin me Hera Gibson



Ko Huirangi Waikerepuru

Ko Whai Ngata, ko Piripi Walker, Ko Shane Taurima, Ko Doug Hauraki, ko Che Wilson, ā, ko Jamie Tuuta e whakarongo ana